

TRIBUNA POLITICA

Adia RTR?

DA SILVA SEMADENI,
CUSSEGLIERA NAZIUNALA PS/GR

Il mund da las medias svizzer sa chatta en ina midada profunda. La populaziun, particularmain la generaziun giuvna, s'infurmescha pli e pli online, mobil ed il pli gugent gratuit. Purschiders privats arivan sin il martgà da radio, televisiun ed online. La rolla e l'incumbensa da la SSR SRG è uschia sut in enorm squitsch politic. Surtut en la Svizra latina crescha la tema che uschia sa rinforzia l'ir d'apart da las regiuns linguisticas e ch'il spiert da cuminanza naziunal pate-schia.

E quai fiss segiramain il cas sche l'iniziativa «No Billag», ch'è actualmain sin la glista da tractandas en il parlament federal, vegniss acceptada. Ella sto vegnir refusada absolutamain. Ella ha en mira l'aboliziun da las taxas da radio e televisiun, tge che signifitga nagut auter che l'aboliziun da la SSR SRG ed uschia era dad RTR. Cun stritgar trais quarts da sias entradas n'ha la SSR SRG betg pli schanzas da survivor. En vista da lur dumber da la populaziun n'èn la Suisse romande, la Svizra italiana e la Svizra rumantscha betg ablas da realisar ina purschida da medias cuntentivla mo cun las atgnas taxas da radio e televisiun. Passa 25%



dals daners da taxas da la Svizra tudestga vegnan oz surlaschads a las trais regiuns linguisticas pitschnas. Quai è manar la populaziun per il nas, sch'ils iniziants da la «No Billag» pretendan che la SSR SRG sa duai financiar da sasez. Mo ina ferma SSR SRG cun ina finanziaziun garantida ed ina gulfaziun da finanzas interna po resguardar era las linguas minoritaras. La pli gronda part da las prestaziuns da la SSR SRG na sa lascha betg financiar sin moda privata u commerciala. Igl è dentant statal politic indispensabel che tut las regiuns linguisticas da la Svizra possian far quint cun ina purschida equivalenta, d'ina fitg auta qualitad, multifara e cumplexiva en tut las spartas. Per la Svizra rumantscha sto correspunder la purschida almain a quella dad oz.

La SSR SRG n'è betg perfetga. Perfin per la

coesium da la Svizra plurilingua po e sto la SSR SRG far dapli, sco che l'anterieur cusseglier dals chantuns *Theo Maissen* aveva gia pretendì il 2010. Il parlament aveva sustegnì el dus onns pli tard. La SSR SRG è restada fin oz anc adina in furnitur da medias cun «filialas» en las quatter regiuns linguisticas. Per promover il barat sto ella transmetter la purschida da las differents regiuns linguisticas pli fitg en tut il pajais. Cun la renovaziun da la concessiun per la SSR SRG quest onn preveda il cussegl federal d'integrar intents pli auts concernent il barat cultural interregional.

Infirmaziun d'auta qualitad, furmaziun da l'opiniun independenta, svilup cultural, documentaziun, divertiment e sport en tut las linguas naziunalas: quai porscha a nus tuts mo la SSR SRG. Cun ses programs multifars rinforza ella la cultura e l'identitad da noss pajais. Ella pussibilitescha debattas impurtantas per la societad e la democrazia era en las regiuns periferas e da muntogna. Sias prestaziuns meritan qua e là meglieraziuns, èn dentant indispensablas e nunremplazzablas. La Svizra plurilingua, direct democratica e spezialmain las minoritads linguisticas dovran ina ferma SSR SRG. Perquai n'emblidai betg: «No Billag» = Na.